

UÁMIKKÂS MUŠTEM

Amnâstuv puáhtá heiviittiđ ovdâmerkkân uámikkâs muštotilálâšvuodâst, áášánkulle ulmuu jäämmim muštopeeivi teikâ suhâčuákkimijn, moin muštâččuvojeh suuvâ avalávt nohádâm jesâneh.

Rukkoospuudâ stivree pappâ, eres servikoddepargee teikâ servikoddálâš.

Vielgis lijnijn lovdum peevidi oolâ puáhtá pieijâđ riistâ teikâ krusifiiksi já cokkiittiđ kinttâl.

1. Salmâ

Saalmâ saajeest puáhtá lede eres muusik. Puáhtá kevttiđ ovdâmerkkân saalmâ 45, 65 teikâ 95.

2. Laidiittâs

Álgusivnádâs

Álgusivnádâs puáhtá lávlud teikâ luuhâđ.

P/O Eeji já + Alge já Pase Jiegâ noomân.

S Aamen.

P Mii išedeijee lii Hiärrá,

S sun, kote lii sivnedâm alme já eennâm.

TEIKÂ

P/O Hiärrá liävus tiigijn.

S Nuuvt še liävus sun tuu-uv jieggáin.

Laidiittâssäänih

Laidiittâssaaniđd puáhtá rähtiđ meiddei rijjâht.

P/O Rähis usteveh. Viettip tääl NN muštotilálâšvuodâ / muštep suuvâ meddâlnohádâm ulmuid. Muštâččep, maid sun lii / suoi lává / sij láá mijjân merhâšâm. Halijdep kijtted ohtâsâš feeriimijn, moh eelih mii mielâst. Uázžup jyehid tääbbin meid soro já aibâšem tobdoid. Jäämmim aldaorroom kuoskât mii juáhháá. Immeel, cellim já jäämmim Hiärrá, lii lopedâm lede miigijn. Sun läidee mii sanijnis avalii cellim kiäinun.

3. Psalmâ

Puáhtá kevttiđ meiddei kirkkoive äigipuudâ miäldásijd teikâ eres psalmâid.

Psaalmâ saajeest puáhtá lávlud saalmâ.

Psaalmâ puáhtá lávlud teikâ luuhâđ. Ton aalgâst já loopâst puáhtá leđe antifoni.

Psaalmân labdoo Uccâ kunnee. Ton saajeest puáhtá kevttiđ salmâveerstâ: 60:8. Uccâ kunnee kuáđdoo meddâl vástuääigi, 5. vástuääigi pasepeeivi rääjist.

Hiärrá lii muu keččee,
ij must lah mihheen vááijuv.

Sun tuálvu muu ruonâs kieddijd,
sun joođeet muu čaasij kuuvl,
tobbeen uážum vuoijâdattâđ.

Sun virkosmit muu siälu,
sun joođeet muu rievtiis rade miel
noomâs kunnee tiet.

Veik mun jodáččim sevnis leevist,
jiem poláččii masten paast,
tastko tun lah muu kuvlân.

Tun suojâlah muu kiedâinâđ,
jodettah keččeesobijnâđ.

Pyerivuodâđ já rähisvuodâđ pirâstiteh muu
puoh eellimpeeivijnân,
já mun uážum aassâđ Hiärá visteest
peivijdân loopâ räi.

Ps. 23: 1-4, 6

TEIKÂ

Hiärrá, jorgeet jo piälâsân.
Mon kuhháa vala ájánah?
Äärmit mii, palvâleijeidâđ!

Piemâ mii ármuinâd jyehi iideed,
te pyehtip ilodid eellimpeivijnân.

Tego adeli h mijjân murrâš, adde mijjân ilo
siämmáa maangâ ive ääigi ko mii väivi piištij.
Máttát mijjân, mon uánihâš lii áigán,
et uážuččijm vijses vááimu.

Ps. 90: 12–15

TEIKÄ

Ulmuu eellimäigi lii tego ruávu:
tego kiedi räási sun kukkee,
já ko pieggâ jotá paijeel, ij sun innig lah
ige suu aassâmsaje suu tuubdâ.
Mut Hiärá ármu piso ääigist ááigán,
tot lii avalâš toid, kiäh paleh sust já rähisteh suu.
Puolvâst puolvân olá suu oskolâšvuotâ puohháid,
kiäh pishoh suu littoost.

Ps. 103:15–18

Uccâ kunnee

Kunnee Iäčán já Aalgan
já Pase Jiegân,
tego lâi aalgâst, tääl lii já ain,
avalâšvuodâst avalâšvuotân. Aamen.

Antifoni kiärdoo

4. Ráámmátluuhâm

Lohhoo ohtâ teikâ mottoom čuávuvâš ráámmátteevstâin. Puáhtá kevttiđ meiddei ráámmátteevstâid kirkkoive äigipuudâ mielđ teikâ eres ráámmátteevstâid.

Lohhee almoot ráámmátpitá.

Room. 14: 7–9

Kihheen mist ij ele jieijâs várás ige kihheen jäämi jieijâs várás. Jis eellip, te eellip Hiärá uámmín, já jis jäämmip, te jäämmip Hiärá uámmín. Eellippa te teikâ jäämmip, mij kuullâp Hiärán. Eidu tondiethân Kristus jaamij já koccái elimân, et sun ličij nuuvt jáámmám ko ellee ulmui-uv Hiärrá.

1. Kor. 15: 53–57

Taat láppojeijee kalga kárvuttud lappuumáttumvuotân já jámmee jámimáttumvuotân. Mut ko láppojeijee kárvudât lappuumáttumvuotân já jámmee jámimáttumvuotân, šadda tuottân čallui sääni:

- Jäämmim lii njiellum já vuáittu finnejum.

Kost lii tuu vuáittu, jäämmim?

Kost lii tuu viärju, jäämmim?

Jäämmim viärju lii suddo, já sudo vyeimin lii laahâ. Mut kijtto Imelân, kote addel mijjân vuáitu mii Hiärá, Jeesus Kristus peht!

Mark. 13: 33–37

Jeesus iätá:

”Anneed vaarâ, kocceed, tastko tij epped tiede, kuás tot äigi puátá. Ko almai maadhâš vieres enâmáid já táálust vyelgidijnis addel jyehi palvâleijei jieijâs pargo já ovdâs-vástádâs, te uksâvaavtâ sun koččo kocceed. Kocceed, tastko tij epped tiede, kuás táálu hiärrá puátá: ehidist vâi koskijâ, kâniroorrâs piškomääigi vâi tooláá idedist. Sun puátá fakkist ervidhännáá – váruttid tondiet, amas sun kavnâđ tii uáđimin. Maid mun eedâm tijjân, eedâm tom puohháid: kocceed!”

Joh. 6: 37–40

Jeesus iätá:

”Puohah toh, kiäid Eeči munjin addel, puátih muu kuuvl, já tom, kote puátá muu kuuvl, mun jiem vyejeet meddâl. Jiemhân mun lah puáttám almeest porgâđ jieččân táátu mielđ mut tevdid muu vuolgâtteijee táátu. Já muu vuolgâtteijee táattu lii, et mun jiem adde oovtâgin tain, kiäid sun lii oskom muu haaldun, šoddâđ huukán, mut majemuu peeivi cuuvnâm sii puohâid. Muu Eeči táattu, et juáhháást, kote uáiná Alge já osko sunjin, lii avalâš eellim. Majemuu peeivi mun cuuvnâm suu.”

Joh. 15: 9–12

Jeesus iätá:

”Tego Eeči lii rähistâm muu, nuuvt lam mun rähistâm tii. Cuápcud muu rähisvuodâst. Jis nuávditvetted muu pákkumijd, tij cuápcuветted muu rähisvuodâst, tego mun lam nuávdittâm Iäččân pákkumijd já cuápcum suu rähisvuodâst.

Lam sárnum tijjân taam, et tist ličij muu ilo váimuinân já illood šodâččij olesin. Muu pákkum lii taat: rähistiđ kyeimi kuáimád, tego mun lam rähistâm tii.”

5. Vástádâs

Vástádâssân puáhtá leđe salmâ, psalmâ, laavlâ, čuojânâsmuusik.

Eenâb ko oovtâ teevstâ luvâdijn ráámmátluuhâm já vástádâs pyehtiv leđe vuáruttuvâi.

6. Saahâ

7. Salmâ

Saalmâ saajeest puáhtá leđe eres muusik. Puáhtá kevtiid ovdâmerkkân saalmâ 7 teikâ 46.

8. Ruhâdâspuddâ

Rukkoos

Rukkoos puáhtá ráhtid meiddei rijjáht.

P/O Ruhâdâllup.

1. Immeel, mii almalâš Eeči.

Tun adelah ulmui eellim

já vááldáh tom vuot.

Tun čievah elimân uánihis ááigán

jäämmim syelimâsvuotân

já pajedah tom vuot čuovân,

putesin já uudâsin.

Keejâ já kuulâ mii, kiäh avevuššâp

taan maailm kuáddâm aldemuidân.

Lohđut mii sooroost

já iššeed mii väldid jyehi peeivi

tuu kiedâst.

Kijtto, et tuu táttu

mii puohâi háarán lii pyeri.

Immeel, tuu oovdâst mii mielâ josijduvá

jurdâččid avalávt nohádâm ulmuid,

jieččân eellim já jäämmim

já tuu kirkesvuodâ.

Kuulâ tääl meid joskis rukosân.

(joskâdvuotâ)

Immeel, oro miigijn, ko mii äigi nohá

já ko mii váimu julkká majemuu keardi.

Vääldi mii talle pááikán jieijâd kuuvl.

Tunjin liävus alestâs já kunnee

tääl já avalávt.

2. Immeel, almalâš Eeči.

Kijtto, et tiädáh já tuubdah mii
já mii soro já aibâšem.

Adde mijjân vyeimi já lohđuttâs.

Nanosmit mii osko toos, et puoh lii tuu kiedâst,
tuu tipšoost já áármud syejeest.

Immeel, tuu oovdâst mii mielâ josijduvá
jurdâččid avalávt nohádâm ulmuid,
jieččân eellim já jäämmim
já tuu kirkesvuodâ.

Kuulâ tääl meid joskis rukosân.

(joskâdvuotâ)

Kijtto, et lah adelâm mii
kuáhtád kyeimi kuáimán taan ääigist.

Iššeed mii kuáhtád
meddâlnohádâm aldemuidân meid nuvâhánnáávuodâst,
tuu kuvlân, ármugâs Immeel.

Adde mii uáinid soro já aibâšem čoodâ
suonnjârijd avalii čuovâst
rähis Algaad, Jeesus Kristus, tiet.

S Aamen.

Mii Eeči

Hiärá rukkoos ciälkkoo oovtâ jienân.

S Mii Eeči, kote lah oolmijn.

Pasottum liävus tuu nommâ.

Puádus tuu völdikodde.

Šados tuu táttu meid eennâm alne nuuvtko almeest.

Adde mijjân onnáá peeivi mii jyehipiäiválii leeibi.

Já adde mijjân mii suddoid addâgâs,

nuuvtko mij–uv addâgâs adelep toid,
kiäh láá mii vuástá rikkom.
Já ele joodeet mii kivsádâsân,
mut peesti mii paast.
Tastko tust lii vâldikodde já vyeimi já kunnee nuvâhânnáá.
Aamen.

9. Sivnádâs

P/O Sivnedus tii puohvâldâlâš já ármulâš Immeel, Eeji já +
Alge já Pase Jieggâ.

S Aamen.

TEIKÂ

P/O Hiärrá sivnedus tii já varjâlus tii.
Hiärrá čuovvâdus muáduidis tijjân
já liävus tijjân ármulâš.
Hiärrá jurgâlus muáduidis tii piälân
já adelus tijjân ráávhu.
Eeji já + Alge já Pase Jieggâ noomân.

S Aamen.

10. Loppâmuusik

Loppâmuusik puáhtá leđe salmâ, laavlâ já/teikâ čuojanâsmuusik.
Puáhtá kevttiđ ovdâmerkkân saalmâ 59 teikâ 61.